

DIARII

I APRILE MDXXXII. — XXX SETTEMBRE MDXXXII.

1

Dil meze de april 1532.

A dì primo april 1532, luni de Pasqua. Introno Consieri, de là da canal de sora, sier Polo Donado et sier Gasparo Malipiero, el terzo sier Hironimo Loredan morite. Diman se farà in loco suo. Capi di XL: sier Nicolò Paruta, sier Nicolò Vituri et sier Zuan Maria Zorzi qu. sier Antonio. Savi dil Conseio: sier Marco Minio, sier Lorenzo Loredan procurator, manca el terzo che è sier Alvise Mozenigo el cavalier. Et Savi de Terra ferma: sier Cristofal Capello et sier Francesco Soranzo, il Capello nuovo et il Soranzo vechio. Savi ai Ordeni: sier Zuan Barbarigo, sier Bernardo Navaier, sier Piero Morexini et sier Beneto Zulian; manca el quinto, sier Giacomo Gusoni, el qual non ha el tempo de anni 25, et compie a dì . . . de questo. *Item*, Capi de X: sier Nicolò de Prioli, sier Bernardo Marzello et sier Antonio da Mula, stati altre fiate.

Vene l'orator dil duca de Milan, zerca le do artellarie, oltra le 4 era in man dil castelan de Mus, con li San Marchi suso, dicendo la Signoria nostra haverli dato *solum* 4 pezi, et di queste se vederà, etc. El Serenissimo li disse, che per lettere di rectori de Bergamo eramo certificati ne fono prestati 6 pezi et non 4.

Da Sibinico, di sier Bernardo Balbi conte et capitano, di 19 et 20. Il summario dirò quì avanti. Et fo sacramentà el Conseio dil tenor di le lettere, aziò l'orator de l'imperador non lo intendi.

Fu fato sora le cose da mar, in loco de sier Marin Justinian era savio a Terra ferma, ha compido; et sora l'Arsenal, in loco de sier Zuan Dolfin ha compido; et rimase sier Cristofal Capello sora le cose da mar et sier Francesco Soranzo sora le cose di l'Arsenal. Manca a balotar do savi ai Ordeni, in loco de quei hanno compido.

Vene uno ambassador di la comunità de Bergamo, nominato . . . dicendo quella comunità è contentissima pagar la limitation de ducati . . . milia richiesti, ma voleno mudar el modo de la exactione, *videlicet* . . .

Da poi disnar, fo Collegio di Savi, et consultono se dieno comunicar li avisi da Sibinico a l'orator cesareo; et la più parte de Collegio fo di opinion de no, per esser . . ., sì che se contradicono; *tamen* chi crede et chi non crede.

In questa sera se parti sier Marco Antonio Sanudo, è di Pregadi, qu. sier Beneto, con una barca de peota fino in Histria, et li monterà sopra la galla di sier Giacomo D'Armer che è lì a . . ., et sarà butato a Ragusi. Porta con sì lo elmeto con le zoie et 4 corone de grandissima valuta fatto in questa terra per più persone, per venderlo al Signor turco, con patto espresso dar ducati 2000 al ditto Sanuto per 10 mexi et pagarli tutte le spexe de andar et di ritorao; et stando più, ducati 250 al mexe, et vendandolo più de ducati 100 milia, habbia lui do per cento. A dì 16 marzo andò la sella azoielada, la coverta di la sella et la coverta